



石園全集卷第十三

隨草上

廬陵司馬梅公與夫人遠山氏倡和為詩名以隨草蓋

取諸易之隨時云司馬於予為宗袞予當嫂事夫人故
又得讀夫人之詩餘何其才而且好學也在昔竹友謝
幼槃與內人董氏以好學名李商老以錦衾爛兮偶忘
沙陀之名幼槃遣穉子入內問之應曰康福也又有長
史王君居栖梧山麗英以仙女同隱文簫與彩鸞寫韻
著迹後皆乘仙虎而去劉工部之墨莊陳夫人嘗舉以
教子是皆江右之炳炳者方於遠山似有遜焉遠山以
天柯聖緒毓淑含文生而有女士之德又肆力於文苑



汲汲不遑故其詩體如唐詩餘如宋子請以易詩之大
旨言之易有天地有男女詩則肇於關雎其理一也孔
子曰歸妹者天地之大義乾知始而坤作成傳卷耳者
以爲后妃思文王然則聖人當憂患之時或於美里或
於征伐夫婦未之恒隨也而詩以隨之妻之隨夫臣之
隨君天下之大經存焉吾於遠山推本於司馬夫其備
官銓部水鑑人倫宗社嬰懷滄桑歷變也不知其秉心
塞淵劄司回寺運籌帷幄與政司也鸛鷺於朝蔥珩雍
肅網羅甫解冥冥鴻飛也亦不知其萍浮淮海聊以樂
飢耒秉薄田忘厥故里也乃若開府重臣時近問政三
山普天後進胥仰文獻之舊又不知其賜環就駕重握

津要之權蔭子居官世有簪組之美也遠山夫人雞鳴
輔佐多歷年所榮悴同之相與黽勉則曰隨時而已然
司馬出處關天下之治亂而一吟一詠徵時世之大窾
司馬之玉粟春溫盎然言表者無不可以見其丰度其
藉夫人以有光者則沁入於彤管閨閣之間雖婦孺亦
知司馬矣公年彌高德彌劭倡和無有涯際予不才當
有以再序之時順治丙申十二月朔河濱李楷撰
內子遠山溯慶璿源漱芳翰藻自南州結褵以至於今
蓋十六年於茲矣而此十六年中從余宦燕邸者不過
十之二三此外則浮湘泛蠡涉長江濟黃流往來於齊
魯燕趙之間又復寄託淮海去而復返真不免津梁爲

石園全集卷第十三
二
疲且滄桑更易河山曠邈余既遭時弗逮又賦命不猶
從刀鋒劒血中萬死一生不知凡幾皆內子周旋而左
右之嗟乎境遇抑良苦矣然居常絕無佗倖怨懟之色
遇變復無兒女眷戀牽顧之情蓋其幼嫻禮訓長好詩
書每閒居相對私與揚扝凡朝政之得失人才之賢否
與夫古今治亂興亡之故仕宦升沈顯晦之數未嘗不
若燭照而數計故余素位而行不以險夷生死嬰其心
則內子之力居多焉今余冉冉老矣雖故鄉在望未獲
攜手同歸而一枝安宜亦覺于于然適也偶取內子十
六年中所得各詩詞再一披閱稍加刪定大都觸景而
吟衝口而出白雲紅樹名山大川或傷故國之黍離或

懷王孫之芳草或歎時序之變遷或感行旅之飄零陟
屺望母挑燈課兒而鷓首輿肩風晨月夕與余茗椀清
尊相對欷歔流連此倡彼和而其一段淵秀朗徹之神
博大澹遠之思絕無脂粉如列鬚眉莊生云詩本於情
性亶其然乎余每欲劖劖以傳內子曰內言不出於閨
盍置諸余曰不然至聖刪詩不遺房帷大師采俗尚陳
閨閣如子諸篇以為追班軼蔡駕謝驅姚當謝不敏若
此十數年從余於波浪風濤雲煙變幻則可以論世可
以紀年隨之時義大矣哉倘有刪詩采風者出取而讀
之知余之廓然於夷險死生不以嬰其心者內子之力
為多因其詩以知其人其人可存其詩愈可存也順治

甲午立冬日文江李元鼎偶識於安宜寓舍之譜梅閣
中

詩五十三首

庚辰元日立春舟泊南康望五老峰

冬盡春還淑景鮮
嶺梅片片點宮鈿
檣烏啼雨聲猶嫩
岸柳含芽意自妍
積雪飛林霜瀑布
寒崖帶霧斷邨煙
輕衫遊女笙歌始
爲道扶犁祝有年

晚眺小孤山

飛櫂乘空下暮灣
微霞輕送晚雲閒
沙平岸斷紛殘雪
風便舟行退遠山
好月半彎斜照水
孤亭一柱屹當關
青煙夜薄蓬窗暗
江靜絃調客緒刪

題美人曉妝

新鳥啼驚夜夢還
紗窗朝日映紅顏
婷婷向月雲生鬢
嬈嬈拈霞翠押鬟
落葉風迴金蝶亂
殘梅雨放玉人攀
芳姿不亞調脂粉
彩筆何須畫遠山

卜居南浦送梅君之文江

孺子亭邊且卜居
新懷爲喜詠關雎
池邊嫩柳含紅雨
橋外繡花映碧蕖
乍得怡情還脈脈
却看判袂且徐徐
歸期未定知何日
雁度文江早寄書

冬日河泊阻風次梅君韻

數里淹河泊狂飈
客阻程江魚隨浪
躍棲鳥護巢驚落
日看帆影殘更怯
櫓聲遙知歸不遠
把酒問君情

泊龍興觀塘阻風

解纜違親泛彩帆
帆隨雁落寒塘
西風笛弄山前月
北岸梅飄野外霜
爲愛舒懷酬唱美
却因對景兩風忘
推蓬一望驚濤白
浴浪鴛鴦誘舉觴

贈姪婦徐孃

却愛清光媚
停月上樓新
妝綻芍藥嬌
語度篁篔簹
檻外花雲麗
池前草露柔
爲言夫壻貴
莫怨覓封侯

梅君遊山得梅一枝共賞

曠懷共拾一枝春
儂愛清芳君愛新
久臥東山今出岫
調羹喜屬作梅臣

晚秋懷里

落葉驚殘夢
秋歸人未歸
水明天一色
鴉帶晚霜飛

季冬閒詠

并序

舟次感懷每有懷母之句
夫子輒言曰親舍白雲勞
臣北山母乃似乎余唯唯
但觀歲行將盡春色漸來
天長水闊未免有情何能
遣此因作一詩以朝暮思
親冠於各句之首相與一
笑識之

朝雲作合繫青山
暮霧溶溶水拂顏
思到春還冬欲盡
親看漁火下前灣

泊望湖亭感懷時有兵船隨行

湖亭四望水悠悠
疎木寒槎入遠眸
甲冑參差紛霧起
旌旗歷亂落霞留
雁聲拂漢同雲陣
漁火隨江似月流

夢裏思親情切切起看何處寄綢繆

舟泊鳩茲

水闊春迴接楚湘學啼嬌鳥未調簧起來卷幔窺江色
一抹青山帶夕陽

初秋夜翫

漸覺秋光肅悠悠景色更菊含隨露綻螢度傍花明澹
月搖蛩砌涼雲掠雁聲偶來庭院步忽聽遠砧鳴

曉發遇風

曉鐘報罷放仙舟野地無人鷗自游霧重不分巖與壑
煙深難辨樹兼洲開窗漫覺寒威襲對景還驚節序迺
夾岸帆檣零亂泊排空雪浪幾淹留

舟中憶家

悵矣中懷結悠悠見黛痕林深遲鳥憩春淺澀鶯言殘
雪疑雲岫荒原帶月邨長江風浪靜彷彿夢家園

西梁山阻風

揚帆忽已至梁山細草茸茸兩岸斑崢嶸律層層皆入畫
犯風一櫂日邊還

春日美人

隔林曙鳥喚初晴宛轉蛾眉畫欲成簾外夭桃羞比豔
階前文杏自生英閒將佳句題紈扇却把新音度管箏
薄被風飄香不定懷芳拾翠暢幽情

冬日舟泊石亭寺

維舫三三日浮家是客居金沙眠玉雁銀水載青鷺古
寺鐘聲晚寒江木葉疎朝來何處泊回首近親廬

孟春旅泊

層崖疎柳冒邨煙飄盡殘梅草正芊旅雁欲歸青霧歇
游魚纔撥赤霞懸蒲帆風送歌聲亂竹牖晴開鳥語偏
暝色纔分催落日春山遙望瀉紅泉

暮春擬長門怨

宮庭嘗寂寂草色帶朝煙淚欲題新句愁還譜舊絃春
歸鶯失寵花老蝶爭妍明月閒爲伴君恩與夢傳

初夏感懷

旅邸驚三序思鄉別路賒寄言西去燕鎮日滯天涯

舟泊石城花朝微雨漫興三首

片帆遙指到金陵趁此春光試一登野外笙歌花正豔

寒江微雨散魚罾

芳菲雨過石城新弱柳垂垂鳥亂鳴獨坐小窗溫舊史
舟移不覺午潮生

野甸風添翠絲花鳥弄紅數聲飛雁盡霞落遠天空

賦得煙花三月下揚州

良辰畫舫對清觴夾岸桃花片片香一曲冰絃消永晝

春風澹宕下維揚

暮春同梅君登迷樓舊址

登臨平野甸披幌散流霞點點青山外盈盈碧水涯輕

風侵細柳戲蝶亂殘花佳麗今何處空樓倚日斜

季秋霜月

月滿虛庭霜滿枝輕煙澹澹鳥歸遲風高野外砧聲碎
木落桐陰斗柄移霧隱小樓雙雁過香消深院一簾垂
長安處處飄羌笛為餞秋光欲去時

次湘揚女子韻

并序

辛巳之夏余隨任北上道過新城夜宿旅館觀壁間
塵土漫滅中小楷數行拭而讀之乃湘揚女子感憤
而作也為詩三首冠以小序其詞哀而不怨益可見
其人矣夫小青之遇流恨千古會稽女子郵亭一詩
過客為之憑弔欷歔爭屬和焉而此女此詩以野店

荒落遂無有物色及之者尤足悲也因次其韻三首

以代表章云爾

旅店無心理舊妝春回秋去幾茫茫清風一度驚殘夢
羞把愁容對海棠

君郎真似虎林郎加意何勞更覓鶻願得夫人憐窈窕
翻將鍼線化刀鋌
悠然筆墨有餘香細讀殘吟夜未央惆悵不堪勞夢寐
依稀如見舊紅裳

附原詩

記得當年別後妝楚天一帶水茫茫春容消盡渾閒
事怕向籬邊摘海棠

情識郎非薄侍郎其如無計覓鷓鴣幾番鴻雁臨時
字韻骨柔心帶刃鎡

經年不斷佛頭香願祝夫人壽未央不敢專房稱冠
寵開箱唯取舊衣裳

梅君夜飲大金吾宅挑燈遲之

戍鼓更將盡瓊爐裊篆稀徘徊遲就枕彷彿覺敲扉雨
歇蛩聲細茶香月影微金吾知不禁醉酒可忘歸

夏日題畫

奇峰對出晚晴收倚杖臨橋聽遠流茅屋幾間崖作壁
森森野樹護林幽

長安春日答夢三弟來韻

每接家音未敢開殷勤問使甚時來客窗愛日憑予望
子舍承歡賴汝才旅雁隨翎書別字殘冰敲竹點晴苔
融融泮水芹堪采莫負春風動玉芟

宮詞二首

珠簾初卷聽秋聲碧水輕風蕩紫萍鴛鴦繞玉池花繞岸
相邀伴侶鬪新箏

窗外無人竹影移隔林唯見鳥翻枝芙蓉空憶秋江老
寶鴨香銷獨坐時

中秋月色朦朧四首

清光含玉露何事影朦朧為念姮娥意蕭然此夜中
開窗憑月到剪燭較詩嚴何處飛羌笛殘梧落錦簾

月上疎林靜夢回已到家博山香未滅汲水試新茶
旅雁鳴青際飄螢上綠陰瑤琴侵桂魄秋色總關心
題輓上繡景送葛夫人因是

春山斜日映帆紅野岸松陰動遠風釣艇坐來無箇事
輕橈時度落花中

初春道上閒吟

春到寒應盡微荻漸影園停雲迷野色消雪瀉檐痕柳
拂朝煙起漸流晚渡喧但言經過處何地不荒邨

憶江南

香消午枕夢初長閒聽流鶯過短牆忽憶江南桃葉渡
紛紛歌舞賽霓裳

壬午春為謙菴尊堂壽

祥雲初度日初長絃管頻傳捧玉觴
龍文瑞起映蘭芳瑤池冷冷青鸞浴翠藻森森紫鶴翔
邀得綸恩歸畫錦金灘曲曲水洋洋

金灘余鄉名

秋夜懷歸

竹葉蕭蕭桂發花閒雲澹月轉思家漫嗟無翼隨行雁
坐對秋風數落霞

辛巳桂月觀駕臨雍恭紀

為道環橋盛觚稜瑞日生鸞輦紛露燦龍炬拂霞明漏
盡爐煙沸風迴彩仗清御香飄紫袖懷燕預霑榮

時裕兒在懷

立冬夜話

閒來無事酒憑斟共對青燈鼓角沈夜半不知時序換
一窗寒月倚瑤琴

秋夜二首

亂菊添三徑寒蛩送九秋歸思憑雁寄斜月挂枝頭
皎月臨西牖輕風晚度砧鳥啼驚蝶亂誤作野花生

寄衣

霜月侵風透枕寒相思唯願強加餐離懷千縷憑衣寄
試聽嚴城鼓角殘

仲秋寄五岳叔祖七表

青芝碧藕度仙家谷飲香泉老歲華雁掠紫煙侵桂影
風迴玉露點龍沙流霞共醉三江月弄笛遙看五嶺花

八百洞中添一侶崖頭留有舊丹砂

甲申元旦

春風知我欲題詩吹放寒梅第一枝煙繞玉爐香彩袖
柳含金藥對瓊卮階生萸葉應添瑞頌效椒花可問奇
為愛嬌兒能戲舞滿城歌鼓慶明時

燕臺竹枝詞

東風一度柳先知樹遠煙籠日上遲漫聽家家斟歲酒
逢人斜插鬧鵝兒

屢逢佳節動歸思却戀微官家去遲且把離愁付春酒
笑看燕婦走橋兒

鬧鵝走橋
皆燕市語

石園全集卷第十三

[Faint bleed-through text from the reverse side of the page]

石園全集卷第十四 春曉日五言

隨草下

詩七十九首

避暑嘗移榻風生枕簟清溼雲歸遠岫返照下層城雨
濯鶯聲潤霞飛柳外晴應知荷芰發碧水正盈盈

幾樹榴花雙燕飛喃喃學語入簾幃巢尋舊宇悲前代
粒哺新雛慰晚飢浴罷玄翎疑若瘦飲將紅頰似添肥
凭闌愛汝渾忘暑月上紗窗未掩扉

重陽寄梅君

香雪堂

傲霜枝帶晚霜輕爲憶年年共舉觥幾回欲向登高處
愁聽砧聲與雁聲

孟春感懷

每聞羌笛動欷歔淚染重衫思故廬苑柳含芽眉未展
新茶抱節葉難舒春風逐草愁兼長夜月征鴻信亦疎
爲憶當年蘇武句自憐何日整歸車

聞子規

忽聽啼鴉柳外飛聲聲相喚不如歸人歸何似春歸易
芳草萋萋送落暉

暮春次龔年嫂眉生韻二首

紛飛彩蝶簇羣芳雨歇紅殘日正長細聽鶯聲歌似曲

楊花點點綴羅裳

凭闌無事數飛花簾卷晴光翠影遮却憶江南春欲暮
雙雙燕子夕陽斜

贈涂門姑孃扶僉院印海先生旅櫬南歸

國香零落共天涯旅館蕭蕭聽晚笳伊誓柏舟悲皎月
懷儂萱草悴容華和糜七鬢情難訴姑曾割股擁襯孤兒路轉
賒別酒相看含淚飲離愁無柰逐歸車

孟冬感懷

爲客他鄉已六年幾經滄海變桑田清霜凜凜凋殘葉
澹月溶溶罩晚煙怨逐漏聲悲漢闕愁隨夢影到吳川
白雲歸盡人千里悵望關河淚黯然

朝佳人曉妝

晚鴉啼散滿林霜
嬌怯初寒淺
淡妝宿酒漸消
金篆冷
怪郎早起合歡牀

暮春二首

閒花落盡淡煙垂
庭院深深小
倦時無數蜂衙
喧午夢
幾行蛛網挂浮絲
教兒漸習家鄉語
喚婢重篋旅邸詩
漫聽梁間新燕子
榆錢聊借買春資
為惜清暉景欲移
畱春無計怕春知
輕風拂柳侵碁局
曉露籠煙覆酒卮
不分落花愁晝永
可堪芳草怨歸遲
憑闌遠憶江南地
無限歌吹正此時

暮春初霽

催花雨歇澹芳辰
小院晴生燕語頻
翠柳垂垂侵曉黛
游絲細細逐香塵
溼雲歸盡煙初裊
醉蝶紛飛草正勻
試看落紅春又老
畱春人是送春人

夏日飲龔芝麓年嫂新閣分韻

小閣亭亭四望通
管絃聲徹紫霄中
風清暑退閒調瑟
日落涼生看飲虹
遠樹參差巡佛案
亂山迢遞隱禪宮
長安花底人堪聚
還擬重來醉碧筒

至日憶母春月壽期預為寄祝

佳辰為憶豔陽天
草色茸茸澹碧煙
鶴舞庭中紛瑞雪
鶯啼柳外奏清絃
芝蘭共逐春風長
銅狄還看海屋連
南望萱花遙極目
紫霞觴進彩雲前

丁亥元日試筆

一夕東風度歲華
暗催柳色徧天涯
寒梅半吐香生被
玉曆纔看莫展芽
柏酒相酬燕市醉
桃符又換故園花
山川如舊冠裳改
城北城南起暮笳

暮春有感

憶昔江南景
香風澹宕遊
花餘約燕至
林靜惹煙浮
翠黛因春鎖
柔腸帶酒愁
異鄉爲客久
空抱杞人憂

飲金夫人宅觀樹間返照倚席賦之

閒看枯樹發新枝
倦鳥頻棲返照遲
碧葉紅霞相映遠
檐畱殘雨滴瓊卮

對奕三首

一縷清香一局棋
數杯濁酒數行詩
紙窗疎影渾如畫

閒看狸奴睡足時

鳥銜梧粒墜金卮
愛聽蛩吟夜臥遲
習習香風熏小院

却因籬畔菊開時

雙雙歸雁過樓西
玉馬頻敲翠黛低
爲憶家園霜後橘

思親無夢到深閨

天竺會菊月游金魚池

天空飛鳥沒還浮
地僻疎林遠更幽
池上好風吹落日

岸傍垂柳繫扁舟
凭闌擲餌翻紅浪
采苻停杯映碧樓

漠漠炊煙籠古寺
泠泠淺水浴輕鷗
壇垣近對黃疑抹

陵岫遙看翠欲流
旅雁鳴沙驚客散
籬花刺被戀人游

殘蟬短咽思炎夏羣鳥頻驕蹋素秋颯颯飄香侵坐冷
晴霞碎纈晚悠悠

春晚雨餘

昨宵點點透窗紗妒我閒庭幾樹花垂柳顰眉眉未展
夭桃含笑笑無涯階前嫩筍堪成竹石上清泉可試茶
燕語喃喃驚客夢輕風初度曉煙斜

雙雙聽暮春遠眺

春深河畔草萋萋滿徑殘花上燕泥苑柳乍成鸚鵡綠
山雞疑作鷓鴣啼閒看落子驚黃鳥細數歸帆度碧溪
風送遠香侵小院一彎新月挂樓西

舟行贈梅君

清風送我出官衙露白橙黃可到家醉後彈碁頻喚酒
詩成閣筆幾烹茶溼雲帶雨歸殘岫野露擎魚豕浪花
是處客帆依暮落凭窗無事聽鳴蛙

寒食

惜春無計賂風姨莓母初生感舊時寒食斷煙深樹綠
清明改火素雲遲飛花亂落鏤瓊砌垂柳蒙茸覆月池
槐葉漸看成鼠耳天涯何日是歸期

夢中詠梨花

朝看初日紅暮看梨花白朝朝暮暮幾回風吹作閒亭
半尺雪

春歸雨後有感

何事春歸歸太速
聲聲細雨頻相促
深紅淺碧沒苔痕
忽聽啼鳩猶在屋
昨宵春去夏欲還
堪歎韶光如轉軸
無數飢鳥噪遠林
翩翩野鷺浮新綠
爾寒爾暖燕將雛
久宦燕都家在吳
是處烽煙隔南北
鄉書數載半行無
朝朝暮暮空懷母
吾母焉知不憶吾
尊鱸漸美秋風起
片帆歸問章江水

昔春無懷金夫人偶成

時同豈凡大司空南歸

一從別淚染楓丹
幾度臨風欲寄難
春夢每隨江水遠
錦鱗為報尺書安
花前對酒曾留句
月下聞琴憶共彈
燕解離愁知索莫
雙雙宛轉話雕闌

春風又寄金四新孃

黃四怪家新孃

比翼翩翩渡若邪
才堪題柳鬢堆鴉
輕妝漫佩宜男草
得句閒看並蒂花香
度熏風翻紫燕簾垂
新月映丹霞
綠茵冉冉迷芳徑
媿我飄萍隔海涯

春日

一林花逐鳥聲開
幾度清香入院來
細雨蒙茸驕柳色
青梅如豆燕初回

梅君避暑山寺寄答

避暑宜尋寺
何當永別離
鶴歸清梵後
鐘定旅吟時
世亂教兒嬾身閒
仗佛慈行裝自羞
澀惟寄錦囊詩

立秋

黃鍾樂奏雲翹舞
商律初回成九數
翩翩石首化飛鳧

灼灼流螢生草腐久客他鄉歎蕭索況值閒階一葉落
檐留點滴助輕涼雨洗蟾光清更薄却問秋從何處度
多在深山與遠樹西風忽爾透窗紗新雁數聲堪作賦
玉衡今欲低山河已非故天香又向月中飄南北烽煙
阻歸路

寓天津喜聞寇退

一自滄桑改驚魂尚未安連宵烽火急拂曙劍光寒
膽怯心如繫愁添鬢欲殘星馳傳羽檄風勁擁雕鞍
月上櫂槍沒煙消海宇寬家鄉音問杳世亂去留難

舟回聞戊子九日感懷

時梅君以津撫波累將歸

飄泊天涯外棲遲遠署中無端遭星累猶幸脫樊籠別

淚三秋雨愁懷九日風驚看延壽客嬾佩辟邪翁
薄暮孤帆遠深閨旅夢通登高頻悵望錯認幾艨艟

春睡

人為夢相羈明窗影欲移鄰雞頻唱午旅客強吟時柳
逐鶯初轉花含蝶未知河開春信早天迴鳥還遲風度
餘香裊煙銷細羽隨閒雲紛擘絮野水亂流澌極目鄉
關遠歸鴻動我思

偶見燕燕扇頭詩因其韻嘲之

篋頭吟短句疑度浣溪沙面面盈秋水

號八面觀音

婷婷步落

花

金蓮甚小

新鴻來遠塞舊燕泊誰家

故相姬

莫醉閒亭月迴風

化作霞

其身甚輕

憶鄉

昨看月半規今看月已彌晚霞天欲暮深樹鳥鳴遲異鄉十餘載寧不懷弟妹椿萱音問稀歸鞭豈容待心緒擾如絲春光知不知無使花再發俟客到家時

七夕同梅君小飲

暑退涼生簟秋容染碧空雲開青鳥信香度玉樓風輕穀蜻蜓翠微醺菡萏紅銀河清炯炯應照兩心同

歲晚寄意

遙望疎林裏頽巢積曉霜枝頭懸玉箸河畔響冰牀

京師

俱以木爲牀
往來冰上

處處炊煙合邨邨釀酒香北溪梅未吐南苑柳

含芳歲暮歸應迫春回刻漸長浮雲穿古堞凍雀隱雕

梁日落千峰冷年催萬戶忙倩鴻將短句趁月理行裝自有刀環約何須滯上方

立春六日挑燈偶成三首

并序

余隨梅君寓京都十有一載而患難頻經憂懷莫展茲幸倦鳥南棲暫居八寶吾君得以優游於山水間余亦怡然置琴花於淨几假書史於鄰媛夜課兒讀不覺漏已平分矣忽迅雷風烈雨下如注時驚蟄未交天道又敢問乎計君之程當在秦郵必飲王司空家因以嘲之嗣信至果如其擬也附記一粲

盆梅發亦向南枝點點冰花散玉池幾陣幽香侵夜永寒雲漠漠雁歸遲

閒來訓子惜三餘，啜茗論文總自如。世亂滄桑貧不易，架頭幸有讀殘書。

芸窗斜月影朦朧，倏爾轟雷走疾風。遙憶片帆今夜泊，料應見慣讓司空。

辛卯五月隨梅君北上夜泊橋頭風雨驟至漫

賦

湖光萬頃接遙天，滿目蒼茫異去年。五月長征承簡命，三更嚴柝對戈船。層雲杳靄迷鳧岫，蔓草菲微泛鷺田。爲問老麋何事怖，夜來風雨隔邨煙。

南陽晚眺

雨餘天欲暮，倏爾至南陽。日落山容斂，風輕野趣長。黃

頭欣鼓角，白叟載壺漿。亂水衝橋急，孤邨刈麥忙。遠霞疑若岸，繇鶩恍如霜。初月纖纖影，新荷澹澹香。扣舷裁短句，續夢趁微涼。細沆斜紋篔簹慵，成翡翠妝。暝煙籠別堡，對景一飛觴。

辛卯長至日得漪蘭熊年嫂白門見懷詩四首

依韻答之

別夢年來遠，度淮暮雲春。樹憶瑤階仙，帆自逐秋聲。杳每對清風，想玉釵。

長安濤甚廣，陵濤誰謂山人索價高。

時雪翁俱奉召入京

漫把雲和

酬白雪空懷霜穎動林璈。

繡線頻添復一陽，仍憐時事等滄桑。秣陵煙草今何似，

南雁飛飛有報章

天涯猶憶共艱辛
雪後寒梅欲放春
寄語燕臺堪對酒
山公還是畫眉人

壬辰春偶覩同鄉康小范年家媪寄外詩詞清
新俊逸想見其人因漫屬和以志同聲

又值豔陽天花飛撲鬢
蟬倚窗評燕語撥柳問鶯眠
繡閣傳芳信文溪濯錦箋
漫聽清漏永遙和白雲篇
綠嫩紋疑織紅深媚欲然
故鄉新月吐應照掌珠圓

三月廿八日同金司馬龔奉常兩夫人往觀東

岳盛會是日立夏

共作春明客居然似故鄉
漏隨時序短貧向日邊
長池

暖魚兒躍梅青燕子忙
童裝高漠漠髮影照旂常
歲稔知民樂帘飄識酒香
靈岳天為帝神威藥是王
鏤幡霞散綺絢彩錦成行
樂奏黃鍾律花開紫鈿珖
千秋傳采石三醉羨純陽
賽會中裝此二景雨洗緇塵淨風侵柳絮狂
曉煙籠翠羽瑞色隱河舫
綠鬢低垂幕紅纓蔽遠芳
膏粟聲聲度燕支隊隊妝
油車連寶馬豔舞雜飛觴
但覺人心豫惟聞佛號揚
太平歌有象歸鳥任迴翔

題五絃宮保陳姬遺照五首

仙仙逸態有餘芳
細覩遺容寫恨長
數斛明珠江底月
清秋和淚浥玄霜

廣陵曲罷影離離
却憶無人私語時
化作彩雲歸楚峽

還從幽夢任情癡

丹霞疑貌月疑神誤落塵凡幾度春草色自憐青女怨
畫眉難畫畫中人

曾譜新琴小忽雷三生石上意徘徊桐陰暗護纖纖影
坐對紅殘冷玉苔

菡萏依微似昔妝茂陵秋色老橫塘芳魂自逐歌聲杳
翠幕仍聞細語香

春日即事

春深無寐惜芳華坐對閒窗簡五車院柳漫窺青白眼
茗槍新剪短長芽餘寒尚怯飛來雨薄暮還憎速度笳
二十四番花信後天時人事總堪嗟

春歸記夢

輕風吹夢繞天涯夢到家園事事差幸有殘書窺脈望
還餘勺水浣銅牙彈棊漫效今時局問月空憐舊種花
春夢一場還是夢春歸猶自帶冰衙

偶擬前遊仙曲

翠幕風柔燕影斜遠峰含雨落窗紗連雲拂漢承朝露
帶月乘槎擢晚霞氣撼陰晴鞭紫石光搖波浪走金蛇
人人欲作千秋夢七七能開頃刻花共喜方瞳裁竹素
閒吹短笛和蘆笳榆錢漫簡資春酌柳絮閒飄逐鬢華
欲向柯山枰一局爐頭應有舊丹砂

和陳海寧夫人韻

時夫人攜長公孝廉歸娶有詩留別

望衡未幾接寒溫話別匆匆月到門知度曉風生彩鷁
每吟新韻動離魂今時錦書歸迎婦他日含飴喜抱孫
早晚鸞驂來畫閣小春花發待開尊

壬辰七夕

簾卷清輝透碧紗笑看兒女供茶瓜金梭盡織人間巧
銀漢空傳海上槎欲爲雙星添漏永還驚一葉逐年華
西風又度悲秋客繡屋光垂駐晚車

浴佛日詠雪

但覺衾寒怯曉風猶疑霜帶五更鐘開窗漫羨泠泠白
撥火時憐豔豔紅暗約春回欺翠萼閒隨冬盡待芳叢
溶溶欲化菩提水果證非非色相空

贈涂年姪女南歸

并序

涂映薇年兄女王公子小韓之配也兵亂入都熊雪
堂少宰解驂贖之育余邸舍數月小韓使使迎歸姪
女依依不忍別走筆六章以當折柳

每話家園淚雨潛薊門秋老雁初還驚魂自逐瀟湘水
忍見湓城山外山

憶昔章江江水潺幾將清瀨葬紅顏香飄欲散人猶在
厭聽笳聲夜獵還

時慰愁容強作歡漫傷親串半凋殘珠簾暮雨西江月
盡付離人馬上彈

鬻雪餐檀苦自持誰憐弱息委燕支青青柳色仍如舊

寄與韓郎知不知

共羨山公古道稀黃金解盡出重圍豐城劍合珠還浦
故國文姬此日歸

欲行猶自故遲遲繾綣鄉情未忍離但喜樂昌鸞鏡合
妝臺重話舊蛾眉

壬辰中秋前三日長安寄懷熊姑母

亂後餘生未有涯幾從薄宦滯京華清霜暗妒王孫草
玉樹遙連帝女花歸夢每同秋水遠靚妝應傷曉雲斜
徐亭蘇圃能如舊卜築還期共紫霞

季春送總憲趙洞門夫人歸廣陵二首

相逢猶恨晚話別且徐徐怕問登程日還疑叱馭初夢

回衡岳雁書寄楚江魚爲憶邗關月期同卜舊廬

齊眉人共羨攜手暫同歸花落山容斂煙深岸草肥取
歡閒鼓柁對酒可忘機 帝簡知仍在重來願不違

癸巳三春後始試筆時將出都二首

春歸方握管夏至又登程借問勞勞客誰爲抱不平
入山猶未晚解組一身輕家釀堪同醉團圓羨此行

癸巳初夏出都畱別金總憲夫人

勞勞歸雁又南征愁聽天涯唱渭城豈以歡娛生別恨
每從憂患識多情潞水浮家歸夢遠燕臺判袂客身輕
庭前共羨森森玉繡戶香風柏府清

畱別龔夫人時夫人將有得麟之喜

苑柳垂垂乳燕忙銜杯共對紫藤香蘭芬九畹堪栽賦
桂落三秋好弄璋旅舍論文知己遠天涯分袂客途長
爲憐別後煩宵夢顏色還疑照屋梁

遊天主堂

并序

癸巳五月將出都門竹醉日同朱石者年嫂遊天主
堂時湯若望太常新拜國師之命堂內結構精嚴圖
像靈幻若浮出畫面數寸凜凜生動令人不敢迫視
西偏小有園鑿方池二引井水激灌其中如趵突如
跳珠逆沸而上不知其從井來也又以木斗置關挾
汲水可仰射數丈其餘種種異製皆目所未覩是日
也雨過風清斜陽在樹從竹徑登崇臺大內宮闕歷

歷指顧間偶詠雲裏帝城雙鳳闕雨中春樹萬人家
之句爲之悠然歸裁數語以志歲月未可言詩也

西域從天主中原奉至尊殊方分野異三教一心存古
殿靈光肅新銜寵命溫莊嚴金碧燦浩淼霧雲屯頂禮
疑如在瞻依覺欲言降魔清宇宙捧日鎮乾坤治曆星
傳祕鳴鐘漏刻翻引泉飛瀑布醉竹靄蓬門覽勝尋仙
境探奇拉女鼻高臺憑禁苑峻闕憶璿源草色迎朝騎
風聲斷夜猿宮花蘆笛落御柳纓新髡此去南歸隱勞
勞擾夢魂

舟望

湖珠

四望湖光白雙鳧臥晚莎葦深聊作岸嵐遠欲連波邨

浸人居艇堡荒盜息戈蒼茫浮一葉此地又重過

和潘太夫人八表韻

喬聖任年兄岳母
老年不廢吟詠

八十能文世豈多蓬萊清淺幾經過為聯柳絮慙希孟
政值陽春瑞采和有待陳情紛紫萸無涯樂事詠菁莪
淮流不亞甘泉飲嵩岳遙瞻頌若何

後遊仙曲

珍酣玉液奏紅霞縹緲蓬山影綠華鐵笛吹殘香夢遠
金沙餐落鬢雲斜猿啼石室窺丹竈鶴舞松崖駐絳車
欲共鸞驂能著我潢流飛渡問仙槎

石園全集卷第十四

石園全集卷第十五

隨草詩餘

爾其燕闕蒼茫潞河蕭瑟人歸落雁思發蓴鱸舟容與
於寒流車逶迤於遠道莫不詩歌蘇李酒映琉璃慶易
水之生還羨鑑湖之得請乃有名媛實儲天族詞鐫玉
瑄色豔瓊葩惜聯佩於香奩恨分攜於桂楫畱連北渚
調寄南鄉刻燭華敷集縑珠瑩意榮飛從碧落情霄迴
出丹霞芙蓉雙頰澹染秋旻楊柳一灣孤憐夜泊筆韻
蕭森蘊雲開之秀逸篆文璀璨存石鼓之莊嚴於時薄
煙生野皓月臨軒望翠幃之將歸挹彩毫之飛動宛彼
麻姑暫臨經舍丁寧青鳥復反瑤池無才屬和等白雪

與陽春畢世珍藏陋隋珠與荆璧云爾丙戌之秋同里
熊門杜猗蘭題於潞河舟次

杜猗蘭為熊雪堂少宰廣陵內君也共丁國變周旋患
難不啻手足丙戌秋月猗蘭隨少宰得請南歸余偶製
南鄉詞送別都門淚落霑襟猗蘭潞河發舟寄余此敘
心誠媿之往來曾臆今且數年於茲矣因以小詞災木
借冠於首以記余兩人離合之歲月非敢如三都之重
左思太玄之擬桓譚也甲午立冬日遠山識

詩餘九十三首

擣練子四首

曉看春色

春睡起嬾為容澹澹衫兒怯曉風林外乍聞鶯語嫩煙
銷細柳挂殘虹

晚眺秋汀

蘆花岸晚煙籠溶溶碧水映愁容何處小樓吹玉笛天
涯游子歎飄蓬

和

梅公

妝乍洗露芳容楊柳腰輕不耐風遙望橋西桃李色一
江春水駕雙虹
檐雨滴岫雲濃溶溶碧水映愁容底事芙蓉羞不解滿
頭釵鈿怨飛蓬

花月詞一首

本意

花影移月影移梧葉驚秋落更聲入漏遲西風幾度芙蓉發試問歸鴻知不知

法駕導引四首

兒裕公車北上梅君送至秦淮時值嚴冬喜南風大作偶成此調

君亦去君亦去離思復重拈憶到金陵花正發愁吟詩句淚頻添多因誤失占

欣風動欣風動吹送孝廉船此日清霜欺客被來春紅杏簇朝鞭佇盼錦標旋

寄和

梅公

春律轉春律轉得句共誰拈風雪祇堪遊客醉江湖唯有歲年添頻頻吉兆占

垂楊柳垂楊柳莫漫繫歸船繡戶香生鶯喚枕玉階浪暖馬嘶鞭夜夢兩迴旋

如夢令十四首

閏春月寄和湘蘋陳夫人并咏垂絲海棠

露浥海棠絲重雲破曉鐘初動無力尚微酣遙映一簾紅弄如夢如夢醒後心兒獨捧

珍重勿教風動怯化彩雲難共燕略可商量銜向妝臺書棟如夢如夢無限春愁誰送

渺渺澹煙輕縱密密花關無縫護徧碧闌干猶恐金鈴

還重如夢如夢春忝叢殘疑仲
聊記燕臺華洞鍊石餐霞曾共別後溼梨雲嶺外蒼龍
誰控如夢如夢盡付鶯花閒
纔罷梅花三弄又早桐陰邀鳳却病且逃禪種藥耘香
清供如夢如夢好趁孟婆吹送

悼婦陳氏

痛殺去年春伸手摘青梅雙供覺意愛酸酸又恐諸姑
歡鬩如夢如夢今得掌珠誰捧
念極中懷如擣喔喔雞聲破曉彷彿似伊前又被鶯啼
雀噪難道難道夢裏之緣也少
苦憶時親文藻欲效希真清照事事可人心言德工容

俱肖誰料誰料風雨妒花何早

懷歸

何處香風暗透又是中秋時候帶月卷簾窺眉映碧波
紋皺消瘦消瘦惟有燕山依舊

和

梅公

庭苑曉風吹透正是月明時候行過碧闌干一帶綠波
常皺消瘦消瘦那得容顏如舊

無題

天與湖光一派惟有青山稍礙水落岸痕深還恐魚龍
嗔怪欵乃欵乃箇箇菰菱滿載

為笑君儂奇怪日夕拮据詩債倚棹詠宣房蕩蕩懷襄

天外堪戒堪戒遙喜人家數塊

和

梅公

夢到潯陽九派依舊雲山遮礙浪闊雁鴻遙堪笑然犀
照怪欸乃欸乃夜夜船空月載

咄咄向空書怪詩了還添酒債朝暮看雲煙過眼皆成
身外知戒知戒勞逸惟憑大塊

長相思二首

思歸

憶家山盼家山世亂紛紛求退難羅衣淚染斑
昔為官又為官甚日歸兮把釣竿空看楓葉丹

和

梅公

望雲山過雲山身似羝羊進退難青衫淚點斑
說辭官又之官林下何人把釣竿負他雙岫丹

卜算子二首

兒裕幼時偶購小碁與予對局云以馬敵將
因戲拈此調用幼安韻

穉子學彈碁出將先馳馬却把輸贏仔細論畢竟吾輸
也曼卿嬉是石學士云非瓦生子須如李亞兒為紹
詩書也

和

梅公

驥子與龍媒勝我駑天馬切莫癡頑似阿翁便是佳兒
也當日夢飛熊始信璋非瓦願汝聰明讀父書出馬

應誇也

菩薩蠻三首

立秋戲贈梅君

涼風款款驚愁客
蕭蕭短髮衣衫窄
秋色入園林
新蛩鳴夕陰
江南尊正美
欲趁蘆花水
簾卷月痕收
砧聲和笛悠

和

梅公

梧聲夜促他鄉客
干戈滿路天涯窄
把臂問投林
空階凋綠陰
菰羹邨釀美好
釣秋水
楓落布帆收
漁歌何處悠

閨春

惜春自是因春瘦
欲寫新詞應未就
人苦戀春情
春歸不戀人
春道歸非早
百二還嫌少
人不解春情
翻云春撇人

采桑子一首

和雨後聽琴

梅公

稀疎紅翠檐前滴
葉上珠圓牆外聲
喧愛聽新涼起
亂蟬逃名疑在青山麓
受用涼天一曲遊仙撥
碎西風指上絃

醜奴兒一首

雨餘

田田荷芰含疎雨
蕩漾珠圓蕩漾珠
圓綠柳枝頭晚噪

蟬
琴清香澹渾無暑好似秋天好似秋天欲操陽關
第幾絃

減字木蘭花二首

次康小范孝廉乃政寄外詞

杏園春暮豔奪朝霞露雨露翠黛痕收笑對桃花小檻
幽
雕梁燕語草長靡蕪知幾處彤管蕭蕭和罷陽春
柳絮飄

采和韻代寄

梅公

雨朝晴暮豔似芙蓉花上露墨瀋難收一派秋聲紙上
幽
倩他傳語應識霜砧來往處曲徑蕭蕭不定楊花
隨地飄

清平樂五首

丙申歲值閏五余同兒子裕乃端二端四生
辰戲占二闋時梅君歸里

庭榴未吐應待重重五躡柳迎標喧遠渡幾點桐花驟
雨
書符戲研荷珠良辰且盡歡娛鶴草媚添三徑釵
頭勝選雙鳧

後端陽

奇歸於劫又是端陽節艾縷葵榴增競色誰和仙歌益
葉
水晶簾卷筵開將花燕燕飛來却喜重逢初度蒲
觴共醉霞杯

丁酉重陽前二日移居湖莊小樓欲覓舟遊

而風雨竟夕
宵清漏長共臥湖莊上纔與西湖小結鄰未識湖山情
況相將泛彼遊航爭柁天公妒賞故令風風雨雨却
來裝點重陽

元日試筆

清煙正吐玉漏頻催五數點梅花芬繡戶猶帶冬殘嫩
雨相看醉飲屠蘇歸來更盡歡娛却喜新添佳婦稱
觴漫進雙鳧

和

梅公

風飄韻吐柳種陶君五漏洩春光倩雪補猶雜些兒舊
雨深山已斷樵蘇荒城且足歡娛酒盞閒斟新醞天

邊任落飛鳧

西江月六首

暮春雨後

細雨欲收春去殘花暗約鶯留無心閒翫強登樓陌上
遊人還有泥滑難將舊恨提壺喚起新愁天涯芳草
共悠悠爲問海棠誰瘦

和

梅公

春似被風吹去花應爲月稍畱了無情緒怕登樓舊事
子虛烏有輕絮不粘好夢新蒲慣繫鄉愁王孫歸騎
興悠悠空害那人消瘦

詠雪

色透明窗皎皎光含遠樹泠泠寒梅偏欲鬪芳馨倩誰
與君浚勝任撲珠簾不卷漫呵綵筆閒吟紛飛點綴
鬢邊新婉惜釵橫不整

和

梅公

剪剪寒枝亂落紛紛素羽飄零孤光素月淡無馨不與
羣芳角勝細裊爐煙對語閒烹茗聯吟關山玉笛
一聲新揉碎鄉思莫整

閒庭睹小貓數箇潔白可人戲拈以博一笑
彌月狸奴堪玩新池魚婢應忙時時偷覷水中央或在
薔薇架上臥似綠茵滯雪騶疑錦幔飛霜穿林箇箇
染清香撲著蟲兒誰讓

效希真體

處處烽煙未息邨邨農務應荒閒看世路若登場拜將
乞墦一樣第宅田園何用非僧非俗空忙何須待漏
與披霜醉臥三竿日上

南歌子六首

秋宵不寐時聞海警多訛月下偶拈山谷南
歌子和以舒懷

俱是悲秋客清光獨照誰海波伴擲報韓椎春冰易散
空令夏蟲疑風勁如鳴角時危嬾畫眉驚秋日斷雁
來遲除是酹天重定始平時

繞樹驚三匝狂歌媿四明無端方寸若懸旌爭得凌空

飛度萬山深 石怪風疑虎峰高木似兵何時醉月酒
頻傾惟盼欃槍盡息海波平

中秋微雨待月時江南捷音適至喜疊前韻
鷓退曾飛宋鯨光豈照明石城烽燧亂旗旌君親未報
徒使陣雲深 羽檄頻傳捷天應厭甲兵嫦娥空斂露
莖傾且放今宵月朗慶昇平

和時寓滄浪亭

梅公

南國音書斷愁來欲問誰可堪救趙信陵推風波無定
聽罷又還疑 思發尋源擢仍攢入社眉閒亭寥落夕
陽遲贏得微酣香閣對吟詩
樹杪檣中出波光鳥外明忽聞鼓角動旗旌道是樓船

下瀨趁秋深 蜃市空傳檄天河欲洗兵蛩聲斷續耳
邊傾竚聽鏡歌千里暮雲平
兔魄方滋露蟾光似閔明廉纖細雨溼霓旌何事寒宮
祇自鎖高深 吹徹煩絃管澄鮮賴甲兵凱歌風送斗
斜傾為看清輝依舊海氛平

浪淘沙二首

七夕前一日晚坐納涼忽聞隔牆王玉孃撫
鸞鳴鶴舞之音戲拈小詞

新月映眉妝露滴花房香風暗透薄羅裳何處清音偏
著耳恰在西廂 切切指生香雅韻悠揚願天速變我
為郎竟作牽牛他織女來日成雙

雨中感懷

香度小窗中燕啄花叢雨聲滴碎遠來鐘家信杳然何處覓且待新鴻 睽越此情同歸念匆匆溼雲迢遞鎖明宮為問滄桑無限事今已三逢

望江南三首

長安憶母

閒署無聊春光又度偶觀梁燕有感

女如燕幼時繞芳院欣逐東風入帝京漫邀鶯侶依宮苑閒趁花飛片 不如燕有翼還猶便子規何必向窗啼旅邸愁懷自繾綣南浦迢迢不見

南歸舟抵京口適梅君有金陵之行期同虎

丘觀月及次澣墅而楫音尚杳因寄此調時

中秋前一日也

行未幾秋色已平分兩岸蒹葭縈晚權數行新雁落寒汀何處響秋砧 頻候久消得幾途程客裏那堪重作客歸人何似盼歸人休辜看月盟

和

梅公

因甚事攜手又重分淮水潭深迷夜雨

時宿龍潭雨甚

吳江楓落

冷秋汀客裏怕聞砧 忙發權咫尺隔嚴程鷓首風清寒漏角虎丘月滿趁遊人把酒話深盟

木蘭花一首

秋雨

囊空幸有書堆案柳斂青眉秋已半急風斜雨助輕寒

碎滴芭蕉驚夢斷 芙蓉醉雨真堪翫 戶外一聲初度
雁清霜有意妒芳華 故使年光容易換

鵲橋仙一首

七夕

秋清漏淺柳疎煙澹 恰透冰痕一線 鵲橋纔度晚風輕
覩橫空銀河如練 雙星欲住嫦娥催去 猶喜雲縈雨
絆為邀神女費青蚨 二千萬年年一見

南鄉子四首

思親

弗寐數更籌 玉露盈盈曉未收 睡起凭闌無限思悠悠
為鏡多情照我愁 却憶畫眉傳 故把新詞寄遠遊 又

望白雲歸且盡 添憂何日承歡戲綵樓

和

梅公

滴滴數更籌 雨打芭蕉聲未收 遙憶尊親思覲面悠悠
萬疊雲山萬疊愁 賴有鳳皇儔 魂繞庭闈悔遠遊 舞
綵板輿知甚日 堪憂白髮龍鍾獨倚樓

送熊雪堂夫人南歸

秋色澹晴光 又聽呢喃話別長 隨趁尊鱸歸去早稱觴
帆曳西風遠芰香 何日逐歸檣 不為驚秋淚染裳 雁
足那堪傳客信 悲傷眉黛愁牽酒數行

納涼

瑟瑟芰荷香 風曳蟬鳴別調長 淚眼看花渾若夢悠揚

乳燕雙雙學話梁 初月釣河舫點點蜻蜓扣小窗斷
續砧聲催暑退清涼漫選新詞付草堂

玉樓春三首

流杯掩映油花卜浮磬依稀疑似玉提壺何必喚春歸
院院繡花今謝六 小窗竹影搖新綠困柳眠鶯同睡
足起來恰恰向人啼疑是平陽謳者曲

靚妝纖手拈蠶卜寶瑟金餅閒弄玉輕紅淺澹被羅裳
分得漢宮春六六 鶯啼鳩怨浮尊綠陌上遊人遊未
足翠鈿亂落蹋青歸風送聲聲楊柳曲

梅公

春歸未把歸期卜薄落津頭空碧玉輕橈何處泛蘭漿
寒食看看將百六 飄紅片片依殘綠燕蝶勞勞忙不
足小窗醉酒惜芳辰夢繞家山山一曲

蹋莎行一首

午日感懷

榴火烘晴蘭膏泣露畫舫揉藍堪競渡昔年不解識歡
娛今日愁多無著處 每挹清風時裁尺素此中佳況
寧能悟韶光瞬息又端陽誰趁取此生遲暮

鳳棲梧一首

自嘲

但學填詞稱綺語未按宮商那識其中味一豔次工三

體製飄飄勿帶纖沈滯
閨閣拈題尤不易字諱推敲
爭得尖清句試問古今誰足譽
二安徐卓夫人魏

蝶戀花九首

漫對呢喃渾不語怕說春歸約
略春還未花徑游絲賺
別絮和風搭在雕闌裏
欲解游絲無意緒任滯雕闌
聊也供新句除却詩懷無可慰
江南夢破人千里

寄和一首

梅公

似覺鶯花相對語却道春歸可惜人
猶未積雨凝寒如
戀絮遙情知繫深閨裏
賸有如許閒愁緒想度清宵
端的饒佳句漫憶孤燈聊自慰
荒城斗大惟三里

時寓八寶

雨愁

每確刪愁愁不許却道無愁不解歡
情緒愁自公然呈
兩議餘愁且去閒愁住
賸得些兒無著處却恨雲山
不礙愁來路劇到黃昏天欲霽
明朝依舊瀟瀟雨

和

梅公

除聽芭蕉無可許客邸蕭條一切皆
餘緒宛轉著人難
定議纔離膈上眉尖住
欲問醉鄉何處處又被啼鳩
喚醒來時路似共聯吟人未聚
廉纖幾陣黃昏雨

聞笛

何處茵于聲料峭綠醞紅稀杏子枝
頭小日上緡蠻催
繡早清宵那得披香鳥
滿架薔薇應放了蝶釀花酣

甚覺舒懷抱拭聽長安春信好泥金捷報終須到

和時從吳浙歸家

梅公

岸岸奇峰驚聳峭山水依稀不覺扁舟小未曙聲聲帆
挂早愁聞草際啾啾鳥人常玉山頭又過了漸近家鄉
幼小堪提抱一抹遙青朝爽好開篷浦水真來到

集句

庭院深深深深幾許花落花開惱得人顛顛飛燕又將歸
信誤故園正要鶯花主欲減羅衫寒未去纔過清明
漸覺傷春暮已是客懷千萬縷隨春且看歸何處

和遠山初度

梅公

為醉蒲觴心已許西燕東勞誰管閒愉悻遠水不將輕

舫誤畫堂歸客堪為主可把離情刪削去浮白呼盧

難得茲朝暮共結千秋長命縷蓮歌競入荷花處

覽同宗五絃宮保陳姬遺照用坡公蝶戀花

韻

無限心愁緘素口却恨東風吹折花枝久摹寫丹青描
未就淋鈴已溼青衫皺猶記尊前閒戲走綠怨紅啼
那管人消瘦一曲琵琶今在否相思還問梅邊柳

臨江仙二首

題海昌詞本

欲訪名媛天際杳小巫一見魂消東君應已報瓊瑤挑
燈頻細讀翰墨夜香飄漫道長安春色好馬蹄蹋碎

花嬌流鶯帶月織柔條歸鴻雲外度得意慰寥寥

和

梅公

聞道碧窗鍼線暇詩筒風月勾消何當刀尺在瓊瑤夢
魂飛不到淚逐雨絲飄 蘇蕙文君俱退步茂漪書格
藏嬌柔情不斷似柔條恍聽雲外響雁影度虛寥

蘇幕遮一首

新春小園聽雨

梅公

疊林園愁尚小偶鑿池塘受水能多少偏近春生寒料
峭一霎東風知是花開早 茅亭新煙霧裊對酒賡詩
轉覺人難老忽憶雲煙仙遂杳擬砌高臺一望西山曉

漁家傲一首

春園即事

梅公

卜居勝踞南城曲紅梅開罷玉蘭馥笙簫晝暖怯羅縠
雲來熟夜來偷向檐前宿 方池半畝羣英簇牆頭掩
映千竿竹醉搨濤箋三兩幅能自足倚闌竚待新水綠

風中柳一首

春歸詠燕

滿地榆錢恰是贖將春去亂紅飄殘鶯無語薄情春去
又值黃梅雨燕慵飛繡簾偷覷 嗔婢垂簾幾向枝頭
如訴故銜泥把花箋污晚香浮處見薔薇半吐翠煙鎖
一林飛絮

行香子二首

春晚

花氣熏晴還疑未穩起來猶怯小窗明餘寒悄悄曉露
勻勻聽鴉聲亂鐘聲度竹聲清鶯語頻頻欲話畱春
榆錢可買寸光陰魚兒掠水燕子窺人見紅如醉青如
豆草如茵

人日

翦綵方成冰紋乍醒玉爐香裊瑞煙輕叢梅爛熳細草
將芬見柳初長雲初散月初生翩翩似畫縷縷含金
夔城女伴擊釵橫酒沈花豔笛和風清聽鄰歌發笙歌
亂鳥歌新

青玉案一首

梅公

春雨閒居

梅公

爲山且闢山間路屈曲欲迷來去構箇小橋橫水渡畫
樓長榭草堂蓬戶安頓閒遊處栽花種竹忘朝暮興
到疾書無題句不問人評曾可許空庭雙鶴一天風霧
點點迎春雨

千秋歲二首

春雪

瓊花飄砌點額新妝媚微雨間輕風起同雲迷雁杳繡
閣添香沸囊罄也惟餘薄釀還堪醉幸識貧滋味衙
舍清如水冰欲泮寒應已心隨殘夢遠意攪煩英碎春
又也人歸不似春歸易

和

梅公

游絲粘砌漸覺清光媚鐘欲斷雲初起輕寒餘雪悄茗
戰爐煙沸還問取從來萬事無如醉有箇閒風味歸
權隨江水聽說罷情難已池邊芳草綠簾外鶯聲碎宜
去也花開花落誰容易

御街行一首

九日

霏霏細雨湊輕寒詩興已闌珊歸鴻只解將秋至也不
管燕去庭閒黃花暗約青娥頻顧染就一林斑清煙
漠漠鎖層巒飛鳥倦知還西風兀自吹人醉也休笑帽
落觥殘登高眺遠江山如故雲斂暮天寬

滿路花二首

春日寄外步方千里韻

霞烘膩雨乾月碾醒雲破柳懷歡欲霽營新火侵階嫩
筍翠甲重重裹緩步修林坐何處鶯啼喚醒文鴛交臥
花時閒詠迢遞思江左畫檐風警玉眉頻鎖賓鴻去
也社燕穿簾過量周旋似我早挂歸帆勿只耽山水呵

寒食

雷轟雨若傾電晝天疑破苔鞞翻鑪甲沈江鎖疾風至
矣寒食今朝果笑子推堅臥性拗冰霜撲不滅無明呵
古今高士與世咸相左汨羅堪配祀遷水火酣煙競
酪也著應時過吹毛難鑄錯且醉春光濯纓漱石繇我

滿江紅二首

丁酉仲夏讀陳素菴夫人詞感和

淚眼愁懷聊只把芳詞翻閱句清新堪齊絡緯並稱雙
絕字字香傳今古憤行行畫破英雄策倩玉簫吹徹漢
宮秋聲聲咽 離別悶仍糾結舊遊處燕臺月恨一番
風雨亂紅愁疊羨玉樹森森連紫苑英才盡是人中傑
盼相逢約略在何年從頭說
乍雨還晴怨怨天無分別更那堪淮流涇水共人悲
咽佳節每從愁裏過清光又向雲中沒怪啼痕欲續調
難成柔腸絕 花弄影紅殘纈冰荷覆瑤琴歇問梁間
燕子共誰淒切舉目關河空拭淚傷心杯酒空邀月歎

人生如夢許多般皆虛擲

霜葉飛二首

初冬睡起

梅公

蛩辭秋草霜花亂鴻聲叫徹天表敗荷殘菊共流連陡
覺寒輕悄聽碎碎雀兒噪曉窗凝曙色剛春小見墜葉
紛飛斜影上羅幃却羨旭日偏照 約略屈指光陰橙
黃橘綠塞外朔風來到落英砌枕臥芳馨也趁人懷抱
為惜清宵又過了驚心漸譜梅花調望家山關河杳旅
夢初迴閒情多少

和

餐英依草歌吹緩新詞迴徹雲表小陽春色釀輕寒肅

氣侵人悄聽喔喔雞聲破曉賓鴻漫覩關河小羨好夢
初迴鸚鵡話簾幃賸有閒窗留照 任教睡足三竿紫
門深閉沒箇親朋來到落紅繞砌亂霜華勝瓜殘蔓抱
迅速光陰又過了傷時不效今時調願銀章音書杳種
橘彈棊贏他多少

司馬梅翁斂經濟之業養晦石園遠山夫人以林下之
風聯吟一室二南雅頌洋溢香閨誠人間之快事其視
出自北門憂心殷殷敦王事而愁室謫者何如哉古今
名媛篇什多以風韻取勝然不無浮渲脂黛之習唯夫
人諸作雄渾方嚴具有丈夫之槩至偶綴詩餘穠纖倩
麗不減易安近日陳伯璣李雲田遴選國雅海內閨秀

僅得二人惟夫人與黃皆令良有以也余曾序倡和詩
因披近吟再爲跋此辛丑春日熊文舉書於舫軒

石園全集卷第十五

石園全集卷第十六

石園全集卷第十六
歲杪答梅君維揚却寄
遠山

石園全集卷第十六

鏡閣新聲

詩六十一首

歲杪答梅君維揚却寄

遠山

久越鄉關未忍離
霏霏應值到家時
梅開芳信書憑早
夢繞江干月上遲
彭澤喜裁歸去賦
蕪城愁和寄來詩
新篔正熟思同賞
獨坐深宵且課兒

試燈日寒甚

遠山

榆火新傳起暮煙
驚看玉箸挂檐前
征鴻依侶堂堂去
凍月欺人故故圓
嬌柳漸舒愁并展
寒灰撥盡意俱然
春城紫陌銀花燦
也簡陳燈簇嫩年

春賦
丁酉元旦

梅公

攜得匡廬五老雲歸來涇上碧氤氳春前柳色河橋綠
雪後梅花海甸芬琴瑟聲調千里合塤簾韻叶一庭聞
年華又向天涯度滿引屠蘇且共醺

遠山

曉簇農祥問吉雲攜來春色正氤氳傳柑共醉家鄉醞
得句新聯涇水芬紫苑風迴期象舞芳林日暖待鶯聞
殷勤爲羨歸來早恰對梅花已半醺

春日梅君過素臣湖西桃花莊字來忘歸詩以

遠山

春色宜人曉夢長聞君頃刻到湖莊桃源縱好難留權

調之

只恐劉郎妒阮郎

和

梅公

高柳風吹翠帶長澹煙輕雨媚湖莊等閒爲見桃花色
爛熳晴光醉二郎

夏晚暑甚月夜觀梅君與卓爾弟對奕

遠山

鳥亦棲難定寧堪醉碧筒一枰閒趁月半榻且迎風
茉莉香侵玉芙蓉露滴紅今宵宜水厄徙倚盼新鴻

避暑河亭次韻

梅公

驅炎惟酒盞好事有詩筒石壑宜藏雨河橋漫受風
曉花分露白暑月共蓮紅會有高人約相將問遠鴻

秋風日雨中舟過露筋廟

梅公

荒祠肅穆枕湖濱芳烈人傳是露筋兩岸芙蓉披宿雨
一泓葦荻薄秋雲天邊似欲來新雁草際猶疑叫古蚊
手折素馨遙薦茗清芬撲鼻正堪聞

和

遠山

幾迴陸地變江濱廟貌依然肅露筋氣撼長湖翻皎月
名畱千載重高雲菱城有待迷征雁草檄何堪燎野蚊
十七年來重過此一尊遙薦古靈聞

丁酉秋日舟次京口適梅君有金陵之行約同
虎丘玩月及抵滸墅而鴻音尚杳漫賦一律

遠山

乘風飛渡大江南越水吳山任所探每訊長年程報九
共邀明月影成三錦帆徑泊懷人遠滸墅關留笑客耽
來日虎丘休負約可中亭畔待同酣

十四夜乘月泛舟過滸墅已漏下四鼓遠山同
兒子乘官舫先渡關行凌晨放櫂率爾成韻

梅公

樓船簫鼓去堂堂贏得清宵泛小航野岸蛩聲催落葉
深林漁火照緜霜開尊自剝雞頭美近市微聞佛手香
爲愛虎丘明月在中秋恰好渡關梁

住西湖小樓數日風雨連絲重九泛舟忽爾晴
霽同內人兒子裕悵遊及夜泊蘇隄而月上斷

橋矣

梅公

遠近湖山坐臥收
開窗簫鼓聽閒遊
雲煙朝暮頻移櫂
風雨關河漫倚樓
剛好晴生唯九日
始知月朗是三秋
急呼一葉隨波去
攜手蘇隄索唱酬

和

遠山

迢遞湖山一筆收
濃裝澹染任遨遊
非關西子顏傾國
誰遣東鄰月滿樓
數點漁燈寒野水
幾聲羌笛動高秋
黃花未放柑猶綠
斗酒相攜且勸酬

釣臺

梅公

崇臺懸古壁
危檻倚荒垆
落日帆帆白
澄潭岸岸青
乾坤一瀨風
雨護雙亭
似有幽人語
千秋燦客星

附兒子裕詩

秋日渡錢塘江

飄然一葉泛江行
回首層巒不計程
海氣常浮天竺
月胥濤直撼富陽城
石撐鼉蜃煙波古
地坼龍蛇風雨橫
遠樹千章盤曲曲
賓鴻嘹唳岸沙平

釣臺懷古

停舟巉石下千載
憶高名石劈秋煙
補雲孤老樹撐危臺
荒古徑斷碣鎖殘
衡山色依然在
蕭條伐木聲時值隆冬
裕兒讀書外館心實係焉
因於內室後置一小齋名曰三餘并賦一律勉之

遠山

香雪堂

小齋葺就景幽然命曰三餘訓子賢絳帳曾為名嫗設
青檀勿負舊家傳窗凝午夜寒光肅花發先春凍影偏
點易須教忘漏永焚膏毋讓祖生鞭

和

梅公

雞窗燈火共藜然名命三餘賴母賢白首惟知驚節序
青箱慎勿負家傳邨鄰杏色迎春麗案插梅花對景偏
但得下帷忘歲月爭先為贈繞朝鞭

初春雪夜聽內人彈琴

梅公

移情不必問成連習習春風繡閣傳曲瓦焚香閒理詠
小窗撥火靜調絃冰霜獵獵檐吹玉兒女喁喁茗沸泉
坐對渾忘更漏永飛花輕拂畫簾前

和

遠山

清煙縹緲斷還連何處疎鐘帶雪傳亂疊平沙驚落雁
暗拋輕絮糝鳴絃每傷梁苑空遺簡為賸匡山可問泉
話到興亡頻輟調餘音猶繞畫屏前

戊戌春和上浣日雪翁熊少宰以和山谷梅花

韻見投走筆屬和二首

梅公

春滿湖雲浮襖洛鶯花未老林煙薄芳飈吹雨上條枝
萬綠千紅深淺著坐對榛闌不耐愁懷人時復一出郭
郭外山公蓼水濱讀書萬卷窮冥漠下筆頃刻動盈楮
聲振漢韶競鏗愕鹽梅久係蒼生望弓冶欣看蘭玉託
每談風月氣激昂拾得溪光采玄萼憶昔金露泣銅盤

鴻飛矯矯難絢絡抗章兩度出承明是處山川富奚橐
天子時勤宣室問先生不羨僕射樂嗟余流寓始東歸
相隔嚴城歎離索燕子初來春欲半投我新詩璣壁落
閒追往事感慨生但可戲謔不爲虐石泉槐火又一時
輕衫杏子釀餽酪世事悠悠何足論尊中有酒且共酌
待到清和恣遊賞老來毋負看花約

憶昔驅車出京洛荒荒白日浮雲薄蕭然泛宅如飄蓬
四海一身無處著偶過涇河暫卜居三里之城七里郭
幾度白田聽鶯聲長湖渺渺空玄漠望斷鄉關頻偃仰
談來舊事祇驚愕一朝命楫歸章門孺子湖頭聊棲託
冬來忽忽已徂春花柳綠陰間紅萼幾欲尋春出郊關

一雨封城如繫絡嗟余遊宦四十年歸田依舊笑垂橐
婦能賡詩子讀書老眼摩挲差可樂有友投韻千百言
酬和枯腸空大索從來交道盟金石至今管鮑歎消落
鶯聲澹蕩燕呢喃誰謂寒威猶作虐閒庭疎雨滴廉纖
被服羶裘餐酥酪不唱銅鞮緩緩歸但插餅花花前酌
莫使春光容易殘蘭亭水畔猶堪約

和

遠山

幾年偕隱同歸洛紛紛世態春冰薄今古長安似奕碁
唯有投閒是先著每思登眺帝子樓風雨靡靡滯城郭
荒園頽倚杏花邨社鼓頻傳慰恬漠時吟佳句響琳琅
滿紙煙霞真駭愕續貂髡穎韻難成欲附青雲爲寄託

綠波隱隱泛蘭舟紅蓼森森羨華萼隋堤舊院冷鞦韆
譙國新旌綴珠絡海棠無力怯春寒夢破春愁愁滿橐
融和天氣正芳菲芸窗課子差足樂舞燕翻飛隨碧空
流鶯宛轉驚鈴索屈指韶光又一年閒看花開漸花落
不關春色苦相催但恨封姨還肆虐澹宕輕陰潤雅絃
良宵煮茗奴稱酪却爲聽詩減夜眠舉案呼尊共微酌
寄語猿鶴莫漫猜而今始踐山林約

春分後二日讀雪堂少宰所和鄉叟詩挑燈次

其來韻

梅公

不將縑素點槐藍世事何堪捫蝨談汲古祇應投研北
懷人時或過城南閒來漫作遊仙夢春去忙裁隱士衫

擬向湖山同結社煙波一艇寄頭銜

和

遠山

烏絲細界寫雲藍選伎徵歌譜薛譚新月半窺鴻旣北
小桃初放檻之南竹間煮茗煙籠幕梅社尋花影落衫
是處春山堪采藥玄珠無復問龍銜

即黃精

上巳日同梅君兒子振裕登滕王閣

遠山

水落沙猶曲風恬浪不漩
繡檣依斷渚孤鷺沒遙天
醉柳開新火啼鶻破曉煙
登高欣有賦索價問榆錢

和

梅公

花落催春減潭空映日漩
臨流懷勝集把酒問長天
鳥

語喧深綠漁歌蕩晚煙峰高勞極目爲乏買山錢

戊戌春暮次熊雪堂少宰用黃平倩庶子韻

梅公

白日去不歸忽然暮春者屋角聞啼鳩聲聲花落也欲
揮五絃琴千秋思賀若一室坐焚香攤書酌新學宇宙
歎茫茫萬事唯一捨飢鷹飽郊原古鼠竄檐瓦製成芟
荷裳不羨爐煙惹緬彼絲竹音山水資陶冶詔紙歲頻
頒敢云人喑啞誰亡列子羊而失塞翁馬澹宕浥晴光
大塊文章假幽谷有芳蘭采之不盈把澤畔或行吟相
與波上下望望匡廬峰攜手入蓮社閒歌響球琅調高
和誠寡

和誠寡

陶琴不置絃爲少知音者大道路何岐俵俵奚之也換
鵝寫黃庭怖鴿驚般若忽聽提壺聲閒吟對杯罍悠悠
春又殘依依似難捨秧苗秀若鍼初月盼仰瓦柳絮任
翻飛靜觀塵不惹偕隱杏花邨夢憶梅根冶笑彼含沙
蟻寧同吞炭啞何處問銅駝嗟哉念泥馬偶拾驪龍珠
赳赳逞狐假韶光勿虛擲鶴髮其堪把聞有素心人垂
釣滄浪下胡爲乎弗歸燕亦知春社鷗鳧可結盟賡和
豈云寡

仲夏茉莉花藥垂垂內人每於月下摘取置驄
尾小籠懸之帷中花開香甚

梅公

玉榮垂垂露滿枝月明花影共參差閒來摘向羅幃好
趁取含香未吐時

豈云裏和

遠山

誰將卞玉鏤絲枝影亂瀟湘蝶羽差鸚鵡一聲新月上
移尊閒趁正開時

剝菱

靜對閒無事幽窗剝小菱蘭芬熏古帖墨霧點蒼蠅蛛
絡輕凝雨蝸涎巧篆藤檐聲頻滴瀝夏半劫炎蒸

和

梅公

長懷耽雁芡對語噉雞菱沼靜閒飛蝶窗疎曉觸蠅微
酣珍洞蚿短韻削溪藤共有其咨歎毋煩詠菌蒸

賦在庚戌戊戌偕隱東湖夏晚雨過偶同漁泛即事閒拈

梅公

梅公

江深臥雨憐蓬短月落驚灘泊釣孤窗曉亂雲凝白苧
棹寒籠霧擷青蒲雙飛燕影疎簾卷遠泛漁歌野店酤
瀧暝破煙浮露冷掬香新芡剝明珠

和

遠山

江澄掠鶯晴鷗狎險句聯吟索韻孤窗滿鏡荷翻疊浪
黍肥螯劔擁交蒲雙雙舞蝶迷花夢箇箇穿魚易野酤
瀧遠蕩舟閒載月報瓊應贈夜光珠

讀漢史傷班定遠賢曹大家挑燈感詠

遠山

香雪堂

異域威名三十春，條支安息盡稱臣。
斬巫不遜燕山石，望闕空懷渭水綸。
愛割千秋明勁節，生還一月慟高旻。
誰云塞外平平策，昆妹今傳漢冊新。

和

梅公

絕塞橫行莫記春，單于南北擁孤臣。
乘槎不數張騫使，持節空傳蘇武綸。
告老三年塵赤慙，憐兄一疏泣蒼旻。
嗟哉漢室酬功薄，女史千秋論斷新。

讀史

遠山

還山只合采芝薇，管鮑於今世所稀。
王母預能知聖主，謝媛空自解文圍。
為憐子建災其釜，誰問袁安臥雪扉。
媿我無從揮尺劔，埽除檮杌振君威。

和

梅公

何處山頭可茹薇，風傳花信燕來稀。
卜居未得尋三徑，種樹空教長十圍。
水溢平湖迷釣艇，春荒深院冷柴扉。
胷懷磊落奚從問，靜對無言敵雨威。

雨中移居感懷

遠山

舉國如狂失四鄰，蕭蕭風雨度城闌。
曾無長物堪經意，惟有奚囊鎮著身。
波撼小樓驚夜柝，月明遠水蕩迷津。
胡麻好種還宜種，莫待花開始憶春。

和

梅公

隨地移家不擇鄰，一枝耐可傍嚴闌。
自傷離亂頻經眼，為愛煙波可寄身。
風急鴻音空遠戍，霜寒劍影怯危津。

郊原幸有林如畫丹葉翻飛勝好春

已亥重九熊雪堂少宰相約同遊西山并訪張

逍遙道士以大風阻渡用山谷五言韻見貽因

走筆和之

梅公

一望西山色青翠照巖邦采采芙蓉花眷言涉秋江為

有高人在洞壑老雲窗忽爾魚龍妒波立風不降何日

趁晴旭天響發微撞徑路聞砒咋不受籃輿扛攜將仙

杖九仙又有九節杖著我遊屐雙久矣薄冠冕寧數士元龐龐士元為南州

冠冕滌塵汲丹井懷古集鴻龐況當籬菊好醉來臥玉缸

和

遠山

尋真即是妄論道豈迷邦非負丹崖約狂飈阨大江虎

豹窺孤舍獼猴應六窗遙觀冷眼慧已覺熱心降一念

堅於石機鋒自擊撞落英還可醉潦倒任扶扛道士逍

遙一遊人澹宕雙荷鉏菜有婦不讓德公龐雨竭龍銜

瘠山老鬼芝厖人生行樂耳寧對幾秋缸

自題傳經家慶圖

遠山

己亥冬月小陽天梓里舒翁自越旋俱道丹青稱第一

果然落紙生雲煙何須繪第矜人貴且效傳經教子賢

共坐石牀聯詠好等閒閒處即神仙

和

梅公

問是淵明是樂天衣冠仍共古周旋石牀聯句詩中畫

蘭砌傳經閣上煙骨相只宜丘壑置風華惟愛子孫賢

不須更說神情似一室雍諧已自仙
風華辭幾千
長
冬夜雪霽同遠山小飲風致
江城荏苒歲將殘惟向湖頭理釣竿
天為今晴生昨雪
人因久暖怯新寒多逋真覺貧難遣
偶病頻疑枕未安
坐對深燈同小飲
膽餅花發帶酣看
且效
和
纔到詩成雪欲殘
湖山勝處選漁竿
千金媚腋偏承寵
一榻高眠孰禦寒
乍簡牙籤驚甲脆
遙聞凍鳥怯枝安
晴窗滴瀝還疑雨
為約梅花待月看

庚子元日

對英靈

四

梅公

歸臥江城籥幾更
春來何事不生情
幽花細草迎新雨

野霧輕風轉舊晴
漸喜絳煙銷帶甲
還從歲紀夢長庚
乘閒欲發揚州棹
重過涇源醉曉鶯

和

遠山

東風一度歲憑更
誰道春光不世情
助雨似調新月黛
停雲疑護舊時晴
鵲因有慧能防戍人
豈無誠漫守庚
半飲屠蘇知漸老
喜看庭樹待遷鶯

附裕兒詩

豈事朱旛護歲更
故園春色最關情
粉窩氣溼占新
雨鳥舍煙生補舊晴
乙草遙憐看有乙
庚年為喜見
當康裁詩漫擬吟
花雪好把黃柑待早鶯

宗伯年嫂相期滄浪亭觀女伎演秣陵春漫成

十絕

越調吳歎可並論梅邨翻入莫愁邨與亾瞬息成今古
誰弔荒陵過白門

等閒風月且平分曲誤驚迴獨擅君鏡裏不知身是幻

琵琶猶訴舊時焚

秣陵春有燒槽琵琶

半間亭子半疑舟半識風流半解愁一曲梨雲骨春色

新詩聊作錦纏頭

宜光春色最宜春話到傷情倍愴神凝碧池頭翻舞調

漫聽絲管動江濱

無端古帙易瑤尊花陣酣酣失曉昏自是風情原有種

好教珍重護香魂

婁江風韻寄箏篴身世浮雲類野鷗為寫南唐千古恨

可知不是那時秋

鴛鴦恍入杯中見夢覺還從鏡裏尋祇有樂工偏解事

小樓深鎖聽遺音

盤谷真珠擅妓圍煙波歌態世應稀飄飄迴雪堪爭豔

共占春光對對飛

底事從來實可悲菱波激豔見文漪芳魂誤逐雙雙影

別後傷心怨係儀

仙音似覺歌桃葉幻舫公然機石頭出世不忘情景異

今人能解此風流

示兒公車北上

遠山

香雪堂

吾門事業始唐開繼世天教付汝才已喜故園新折桂
行看上苑早探梅家傳經史須強記策對軒墀著意裁
驛路風霜當自攝春深應報錦衣迴

秋日

遠山

分韻依然得六魚風生竹牖漸蕭疎茶香暗逐秋容澹
露冷微驚鶴夢徐乍聽蛩鳴勻似剪試看蕉影裂如梳
小園日涉渾無事只合鉏雲與著書

和

梅公

吳缸纔買種朱魚簡點園林尚覺疎井汲晴流泉細細
香烹秋斝火徐徐碧梧葉落雲千片白版窗留月一梳
漸喜涼生堪對酒挑燈還讀讀殘書

石園全集卷第十六

石園全集卷第十七

隨草續編

詩五十八首

丙申元旦試筆并寄梅君

共擇南枝穩安宜即似鄉兒童
驕節序桃李豔宮牆淑氣初
迎歲新梅曉鬪妝欣看莫一
葉預喜桂三芳春縮寒江柳
花餘晝錦堂計程應抵里把
酒醉青陽

新正二日寄懷梅君

違家約略纔三月屈指韶光已
二年我自憶君君憶子深秋
果否權歸船

余久恙初愈時值秋歸因感賦寄

慙慙九十負秋光秋去應憐別恨長佛手柑香生夢遠
龍鬚篔簹款覺衾涼久荒筆研裁新句日近參耆較古方
瘦比黃花堪競節嘹嘹征雁又南鄉

長至後得南州家報聞弟卓爾將返弟婦佯有
羞色倚席嘲之共博一笑

幾度檐聲噪聞歸應自娛覩函開復掩訊使出還呼媚
黛生春色天桃靚雪膚佯嗔回畫閣偷空繡雙鳧

丁酉初春家宗伯太虛偕夫人攜小女伎過我
演燕子箋牡丹亭諸劇因各贈一絕得八首

平陽歌舞舊馳名占盡風情最此生欲捐不煩羞掩被
冠裳久已媿卿卿生

新妝十五正盈盈唱徹涼州舉坐驚若使甄妃今日見

應須還讓小傾城旦

斜攏犀梳澹點脣向人含笑整綸巾迴風一曲花如霰

疑是何郎傅粉勻生

飛飛燕子曲江濱為妒雲鬟獨擅春畫到有情渾入畫

這回忘却女兒身旦

銜居副末職為先窈窕師生意更妍巧詠關雎真比興

牡丹亭畔月娟娟末

強轉鶯簧放調歌桂枝香杳動雲和嬌容暗逐韶光老

兒女逢場取次多外

遏雲纔度又凌霄縱效雄裝髮尚髻跳躍一身輕似葉

楚王原自愛纖腰

淨

不顧周郎羨小伶發科全賴假惺惺喬妝最喜般般似
點綴同場樂滿庭

丑

蕭孟昉年姪金陵新嫂以茉莉一株見遺偶成
俚句却寄

叢叢翠榦邁羣芳小院香凝夏晝長桃葉豔分來楚水
鬢華帶並寄雷塘綠陰點染絲英綴粉蝶紛翻舞態狂
恰趁晚妝花正吐柳梢閒月助微涼

西湖喜遇黃皆令率爾言別詩以贈之

想像湖山有廿年今來悔不及花前蘇堤柳短偏宜月
淨寺僧高可問禪影倒雷峰翻夕照靈生天竺倚朝煙

匆匆漫逐秋颿遠欲託離情倍愴然

西湖小樓曉妝

遠近青山落鏡中畫眉何用彩毫工輕調花露胭脂色
點染西泠一夜楓

初晴

久雨初晴花欲飛乍晴新月上簾幃燕鴻交代誰為主
漫倚高樓看落暉

客秋偶憩西子湖與皆令比鄰而居淪茗談詩
方諧夙願惜匆遽別去值此春光能無懷念因
賦却寄時戊戌上浣日也

蕭蕭葉落泛歸航載得湖山返故鄉滕閣煙深懷帝子

鶴亭春老憶文孃步搖擬趁鶯花色條脫閒粘筆墨香
此日長堤新綠滿畫樓吟罷更飛觴

猶記閒坐湖樓皆令攜幼女過訪髮方覆額遂
能誦詩寫法帖楚楚可人今依然夢想間并裁
小詩似之

瑟瑟輕羅澹澹妝柳梢鶯語乍調簧烏雲應拂春山小
紅藥初含夜雨香鴛水毓靈多鮑謝蠅頭妙楷逼鍾王
夢回猶記殷勤別幾欲箋詩燕子忙

丁酉小春抵里

睽越鄉關十六年今朝仍覩舊山川梅疎倦翮尋枝晚
雪映芳洲濯錦鮮春返江干花漸豔霞侵潭影月爭圓

何期久滯淮南客載得清風一櫂旋

人日

每在異鄉爲異客今逢人日羨歸人紅梅爛熳波含綠
始信江南早占春

春日感懷

青春作伴已還鄉贏得新詩賦草堂蘇圃漫添湖水綠
紫桑難問徑花黃荒城處處傷離黍舊燕飛飛覓畫梁
家國可堪寥落甚怡情何地足滄浪

登滕王閣

相看南浦亦悠然誰謂西湖山水妍山水解人人不解
彩鸞疑度萬峰巔

穀雨前一日小室閒吟

小苑焚香逗綠紗
攤書隨意注南華
春衫未剪寒仍怯
午夢初回日又斜
湖外祇堪眠弱柳
雨前誰復餉新茶
中懷脈脈閒無柰
看取游絲綴落花

戊戌端陽久雨初霽

節序煩靈雨西南近漏天
乍寒還乍燠輕縠復輕綿
酒浥丹砂豔蒲翻翠帶
偏簪符懸簾簌鏤艾影翩躚
益智香傳糗酣歌韻入絃
競標聊免俗賽社任扶顛
曲徑皆迷擢荒原每斷煙
衍波裁短賦洞爵綴連錢
霉重欺裘敝腸枯索句鮮
聯拳閒个个交語話
談談霽色初生月清風動綺筵

新秋雜詠四首

欲效長齋繡佛前
可因俗務礙參禪
紫金鐘扣千僧俯
一念能生鉢底蓮

驕陽如火曲池煎
尚有棊聲劫晝眠
幾欲狂呼餐絳雪
還尋幽澗聽鳴泉

秋聲欲動野香飄
漸覺新涼警玉簫
漫聽小鬟初度曲
檀痕輕拍顫雲翹

絡緯初吟漏未央
步虛歌徹美琳琅
盈盈多少相思淚
化作人間夜雨香

初冬兒裕隨親歸里舟次寄詩三章因用其韻
得一律示之

一葉承歡具綠尊小陽春色簇歸輪風生露白縈帆影
橘老林丹醉月痕預望他年觀上國喜從今日到家園
滄桑共羨團圞美為慰椿萱復有萱

代和熊少宰憶昔志感三首

憶昔春明花正開珊珊並轡早朝回藤英滿署餘閒樂
共羨山公濟世才

憶昔風神迥不同飄飄疑下玉隆宮應憐秀筆矜張敞
笑指桃花映水紅

憶昔朱門舊日歡為傷親串總凋殘纔連洛社堪娛老
只恐東山起謝安

仍效陸放翁放歌行代次熊少宰韻

世局紛紛俱不若為有橘中棊最樂輸却瀛洲九斛塵
翻然此去藏丹壑滄桑幾見歲頻移白帝城邊空雁歸
繡花盡作遊仙夢簫管何人出妓圍把臂投林原不誤
翰圃芳洲幸如故江湖應羨兩人閒俱有兒曹能獻賦
初春寄宗伯年嫂并憶煙波曉寒諸女伶
又值陽春景物和怡懷誰解曉寒歌年光荏苒閒愁劇
風雨淒其感詠多玉茗尚然迷柳夢滄浪空自鎖煙波
花繡錫九應增豔憶拍檀痕喚柰何

春曉

側側輕寒裊裊垂嬌鶯初轉最高枝枕綾畫得金釵響
為寄深宵夢裏詩

寒食

性癖耽書媿等身不因憂患倍傷神春光漸老清明候
槐火初傳夜雨新綠樹鶉啼驚短夢翠屏人杳悵芳辰
樽酒釀酪無情緒漫向東風灑淚頻

清明喜霽

清明雨歇果清明綠樹深深乍轉鶯詩債每從窮處了
春愁端向解中生桃花浪躍人迷權柳絮風翻水促萍
為曝琴書蟬夢覺海棠猶自帶微醒

己亥清和月羅篁菴學士越中如嫂以繪扇見
貽喜而賦贈

翰苑深深隔絳紗綠陰掩映冒名花丹青漫染侵層澹
鏤飾頻刪怯鬢斜跳脫每因書楷並隄麋就誤點蠅嘉
相逢恨晚休言別為約秋風渡若邪

燕來遲

柳梢斜挂玉痕纖影落瀟湘促卷簾燕子不來春欲暮
教人空自賦江淹

黃皆令寄來自壽詩依韻得四章

滄桑更覺世情非越水吳山願不違風雅道隆饒遠韻
丹青墨妙寓玄機秦樓尚訝相逢晚徐榻空懸歲月稀
一望蒹葭堪共詠新秋應製薜蘿衣

自信無非可待知嵐光泓影日遲遲芸窗筆染三千牘
優鉢花香二六時賸有湖山堪共賞却言才韻不兼癡

庭階爲愛蘭牙秀，瞻洛同看詠福茨。
今古英雄見略同，笑看翟第等輕鴻。
寧忘盡日蘇堤柳，誰解千秋華岳祠。
偕隱煙霞咸有韻，俄觀色相本成空。
屏開異日乘龍選，花滿西泠醉阿翁。
輕風細雨菊花斑，賴有豪吟可破慳。
每念桑田駕水綠，難拋楓葉虎林丹。
六橋歌管隨雲度，百歲琴書對酒閒。
遙望鸞音天外起，年年擗脯下三山。

戊戌重九日禱雨二首

青女驅車候黃花，尚未開雲疎時漏。
月秋老正藏雷社，燕將愁去霜鴻列。
字回綠林矜上賞，旱魃若爲哉。
去年風雨滯西湖，此日晴生花又無。
天護驕陽空致禱。

尊開舊釀不須酤，非因勝節纔敲帽。
幸有閒江可釣鱸，笑把茱萸裁短句。
寥寥豈獨爲催租。

迎春日讌集宗伯年嫂家，因命女伎演雜劇四首

京兆畫眉

漢廷吏治頗稱循，太守風流實可論。
畢竟閨中偕俊麗，故甘輸作畫眉人。

桃花人面

迴雪婷婷縞帶輕，桃花人面果傾城。
經春一別空留句，辜負雲英繾綣情。

江干解佩

新春重蹋杏花春又見波光漾洛神自古憐才應擬賦
至今遺恨隔仙塵

燕子銜箋
清閨幽悶寄新聲誰料烏衣解誤人銜向曲江成底事
漫教兩地歎芳辰

窗前護惜花卉經冬尚鮮昔王摩詰繪雪裏芭
蕉後人易之以梅故詠此為輞川吐氣時新正

廿三日

立春寧幾日節物已頻遷消恨花將發忘憂草尚鮮寒
因增月閨俗競補天穿雪裏蕉還綠誰能繼輞川

久雨得梅君家報偶賦春字

連絲春雨恹春晴啼徹春光春鳥鳴春色習人人意倦
春風吹夢夢還賡春雲每共春愁纈春思猶兼春草生
春信喜從春候至春遊何處聽春鶯

孟春得兒寄小除詩即用其韻

每懷吾子遠況值歲之除屢寄思親句頻知拜父書夢
回千里共花發二年餘陌上春方轉揮毫動紫墟

梅君札寄卓弟戲問其睡興濃澹何如代賦解

嘲

却憶君書帶笑封希夷同姓不同宗三竿日上睇朝髮
一縷煙酣劫睡容高臥漫驕游子趣生涯只與夢婆濃
閒憑晝永添宵刻暫學敲枰到碧松

以數目字詠雁

一年兩度客天涯未覩荷香十里花八月銜蘆驚旅夢
七絃揮羽亂晴霞風清四野聲偏遠笛冷三秋影自斜
六出飛英寒九塞翩翩五彩絢汀沙

擬古遊仙詩

洪井尚畱丹餐霞堪續席盈盈若輕舉攬之不可得宛
擬至瓊宮互立仙班側倏起江海遊鮫人捧珠出燦爛
起層霄輝煌炯遙辟或理鳳皇琴或窺麟虎迹或誦步
虛吟或促清談膝杳靄度韶音旖旎停雲澤恍惚在天
涯徘徊間咫尺忽覩避秦人忽覩偷桃客劈藕大如船
分脯還煮石控鶴欲凌空懸厓深莫測窈窕復冥冥蒼

蒼何鬱鬱團露染新紅方壺漂紺碧月腦晦還圓星眸
炫猶逸珍重廣成言飛鳧酣數息勝境可能尋山河咸
歷歷六著恍然明乾坤任所適

和生孫志喜

時兒公
車未返

為賡新詠蔚新枝共慶年來事事宜昨喜三秋生女慧
今彌四十得孫奇小名取會簪纓美紹祖期同松柏姿
孔釋圖懸徵吉兆兒歸湯餅醉親知

和輓卓爾弟婦靜芳韻

嗟哉含淚出城東痛徹鴿原悵別同憶效蘋蘩供菽水
忽拋翰墨墜林風湘潭佩冷空餘綠朱邸灰殘久斷紅
幸有大家彤管在芳名流詠簡編中

詠灌瓦梅花研

豈同耽研癖愜意即爲真稽此千年物藏之廿有春洪
齋名尚在雩廟址難詢質古琉璃膩斑凝翡翠勻梅花
欣共對芸草倍相親殺墨無煩力供吟似有神聞聲應
不爽奕世重家珍

石園全集卷第十七

